


KILUMBU YA BAMAMA

 . . . tabernacle, kele kisambu ya munu. Mu kele kieleka na kyese na suka yayi, na kumona kukula na kimpeve ya tabernacle yayi, mpe mutindu, ba me tula kuna, ti bawu ke na kuyidika ntangu yayi na kutunga dibuundu ya malu-malu. Mu banza ti ya kele mfunu. Mpe kumona na manima . . . kana Mfumu Yesu vutuka nswalu ve, na manima beto me kwenda, bawu ke vwanda . . . bana ya beto ke vwanda na kisika ya kukwenda na dibuundu. Mpe beto zola “kunwana na ngolo samu na Lukwikilu yina pesamaka mbala mosi na basantu.” Beno banza ti ya kele kima ya mbote.

2 Mpe na yina mu vwandaka kota, mwa ntangu fyoti me luta, samu na kubwela na bimbangi mingi yina me pesama yimeni landila bakubeluka ya nzutu, ya mwa balukutakanu ya nsuka, na tabernacle awa. Ya ke na kifuluka kaka ntangu nyonso, bakubeluka, bakubeluka ya nene ya ngitukulu.

3 Mu vwanda me bika kento ya munu, kaka malu-malu yayi, mpe bana na kyelo; mpe ya vwandaka na mpangi mosi ya kento, yina kele ya kuvwanda awa ntangu yayi, yandi vwandaka kaka na kyese mingi tii yandi vwandaka dila, samu na kimangu ya nene yina me sala na mutekolo ya yandi ya bakala ya fyoti, kuna, mu banza, na Chattanooga. Mama Nash, awa, mutekolo ya nge ya bakala ya fyoti yina ya kukwamisa na mpasi mosi, mpe lukutakanu ya nsuka awa, Mfumu Yesu, mu banza, tangunaka yawu, mpe tubaka, “MUTINDU ME TUBA MFUMU, ti, ya me kwenda. Mpe yandi ke vwanda na mavimpi ya mbote.” Mpe mwana yayi ya fyoti kele kieleka mbote, kaka na mavimpi ya mbote mutindu yandi lendaka vwanda.

Mpe ya ke—ya ke sepelisa, na kuwa bimbangi yina.

4 Mpe dyaka ntwenya mosi ya bakala, yina kele mpe awa, lombaka kisambu samu na Mama Stotts, yina me luta na nzila ya kupasula. Mpe bantu ke lakisaka luzolo ya bawu; beno me mona, kana muntu zola ve ti beto sambila samu na bawu, mbote bawu . . . ya ke lakisa, ntangu nyonso yina beno ke meka, bantu ke zola ti beno sambila samu na bawu, na yina bawu, ke lakisa luzolo, beno me mona. Bantangu yankaka ya ke kumaka yimbi mingi, tii . . . ata yimbi ve, kasi kulutila mingi, ti beno fwana kwenda kaka kisika mosi mpe kukima, mpe kubumbama mwa ntangu fyoti, samu na kuzinga. Kasi, mu—mu kele na kyese ti bawu ke salaka yawu. Beno banza ve ti mu ke zolaka ve kumona bawu, samu ti kana bawu . . . kana muntu mosi ve zolaka ti mu sambila samu na bawu, wapi kisika ministele ya munu zolaka vwanda? Beno me mona? Beno me mona?

⁵ Kasi bantangu yankaka ntangu beno ke tubaka, “Mpangi Branham, mu ke na kubakula ve ntangu bantu ke bokilaka mutindu yina, mpe—mpe nge ke kima kisika mosi.” Mu fwana sala yawu samu na kuzinga, samu na kusambila samu na bantu. Beno lenda kaka ve. . . Ya kele ve—ya kele kaka ve kisika mosi, awa. Ya kele bisika nyonso na yinza. Beno me mona? Mpe—mpe ya kele mpasi mingi. Mpe mu ke kwikila ti beno ke bakula yawu.

⁶ Oh, ya ke mbote mingi na kuvwanda Muklisto! Mu zaba ve yina mu zolaka sala kana ya vwandaka ve samu na Klisto, mpe na yawu. . . mpe kuvwanda na Miklisto, ti, bantu ya Lukwikilu ya ntalu mutindu mosi, bayina ke kwikilaka na Nzambi mpe ke na kusalaka kivuvu na Yandi; mpe na kukwikilaka ti kilumbu mosi ya nkembo beto ke vwanda na zulu ya bitumba nyonso yayi, mpe kuzwa lunungu, mpe kutelama ya kukuula na mutindu ya Yandi, na lweka yankaka.

⁷ Mpe na yina mu ke zola kaka kusala nsamunu mosi ya fyoti, ti, samu na tabernacle ke na kwiza, mpe nyonso yina, mu. . . beto ke vutula ya malu-malu fondasio ya beto, ya kulutila samu na ba-campagne. Nzila nyonso na balukutakanu, tuka mu me banda na yayi, na lweka ya kumwangisa nsangu, bamvula mingi me luta, na kisika ya kusala fondasio, samu na kuzwa nkonga yankaka ya bantu, mu sadilaka kaka nkonga ya bantu yina vwandaka zaba; mpe kubanda. . . mpe salaka fondasio, ti balukutakanu ya munu nyonso zolaka tambula na yisi ya nkumbu ya Branham Tabernacle. Mpe ba ke sadila yawu na Union National Bank na New Albany, mutindu kisika ba lenda futa—futa mbongo na nzila ya yawu, ti mpaku ke futama ve. Kana mu salaka yawu ve, mbongo nyonso ke kota mu ke futa mpaku, kana mu sadilaka Branham Tabernacle ve mutindu fondasio.

⁸ Mingi kati ya beno me kuwaka munu kutuba yawu, kilumbu na manima ya kilumbu. Mu fwana sala yawu, mpe na. . . samu na kusala yawu. Mpe na yina—na yina beto ke sala fondasio ya malu-malu ntangu yayi. Mpe beto ke zola mutindu bantu mingi zaba ti mu. . . Bantu yikwa me kuwaka munu kutuba yawu, ti kufuta nyonso, mu ke salaka na nzila ya Branham Tabernacle? Beno telemisa kaka maboko ya beno, beno nyonso. . . Ya kieleka, beno nyonso. Ya kele bantu nyonso.

⁹ Mpe na yawu ntangu lukutakanu ke manisa, kana beno zola, mu kele na mwa mukanda mosi kuna, samu ti beno, kana beno zola kutula kidimbu na yawu na yina beno ke basika. Mpangi ya bakala Roy Roberson ke vwanda na yawu na manima kuna.

¹⁰ Samu ti, beto ke sala fondasio yankaka, kima kaka mosi, kaka. . . kasi fondasio yankaka, ti mbongo ya beto nyonso mpe nyonso, yina ke bakama na lukutakanu, ke futa mpaku ve, ke vwanda. . . ke tulama, mutindu ntangu nyonso, na Union National Bank, samu Branham Tabernacle kutwadisa yawu, na

kisika ya kuzwa fon- . . . fondasio yankaka. Samu ti, yayi kele yimeni fondasio, na nkumbu ya Branham Tabernacle, beno me mona. Mpe na yina ya kele na Branham mosi *awa* mpe Branham mosi *kuna*, mpe mutindu yayi, mpe bafondasio ya mutindu na mutindu ya ke sala mbote ve.

¹¹ Mpangi ya bakala Roberson ke kipe yawu, samu na beno bayina zola, na yina beto ke basika. Beto ke sepela na yawu.

¹² Ntangu yayi, na suka yayi, ntete beto kota na kisalu, mu ke zola kutuba, kana Mfumu zola, ti mu ke meka na kuvutuka dyaka na nkokila yayi. Mu ke yinaka kubaka balukutakanu nyonso zole ya Mpangi Neville, kasi yandi kele mingi na bumbote na yawu ti me lomba munu na kuzonza dyaka na nkokila yayi. Mpe kana Mfumu zola, mu zola kuzonza na nkokila yayi na zulu ya dilongi ya kumwangisa nsangu, na zulu ya yayi: *Nani Kele Muntu Yayi? Beno me mona? Nani Kele Muntu Yayi?*

¹³ Mpe na yawu na suka yayi, mu zola . . . mu vwandaka banza na—na kutuba na suka yayi na dilongi na zulu ya Kilumbu Ya Bamama. Mpe mu zaba ti na manima ya midi yayi mpe na suka yayi me fuluka baploglame na Kilumbu Ya Bamama. Na yawu mu vwandaka banza mu ke sala mutindu kuvukisa, samu ti beto zola kusambila samu na bambevo kaka na manima lukutakanu yayi me manisa, mpe mutindu ntangu nyonso.

¹⁴ Beto ke kwikila ti Nzambi kele munganga, mpe Yandi ke belusaka bambevo mpe bantu yina kele na mpasi. Mpe mu zaba ti Yandi ke salaka yawu. Mpe ya kele kulutila ntembe nyonso—nyonso, yina, samu ti ya kele na bimbangi mingi ya kufuluka, yina beto zaba.

¹⁵ Mazono mu vwandaka tala na saki yina Mpangi ya bakala Gene mpe Leo kubumbaka kaka, ya bimbangi yina bawu bakaka. Mpe ya vwandaka saki ya nene ya bakubeluka ya mutindu yankaka, ya ngitukulu yina Mfumu me sala samu na bantu.

¹⁶ Mpe mu banzaka, kana ya ke vwanda mutindu yina, yinki kana beto bumba yina nyonso yina salamaka? Mu banza, na Porto Rico mpe na Jamaïque, kaka, zolaka vwanda na mafunda kumi, to kulutila, bimbangi ya bakubeluka ya mutindu yankaka, ya Mfumu, yina Yandi salaka.

Ntangu yayi ntete beto zibula Buku, ti beto zonza na Musoniki.

¹⁷ Mfumu, beto ke vutula matondo mingi na Nge, ti ya kele, ntangu beto ke kulumusa bayintu ya beto, beto ke tekita na kutuba; samu ti mu ke kwikila ve ti ya kele na bikoba ya muntu na kutuba bansatu ya ntima ya bakala to kento mosi, ya mwana ya bakala to mwana ya kento mosi, yina me kutanaka ntete na Nge. Samu na kulakisa kukembisa ya beto, na mutindu beto ke kembila Nge, mpe yina Nge zola kutuba samu na beto. Ya ke kabula beto na disumu, mpe ya kukabula beto na yinza. Mpe ya

ke pesa beto kima yina kele ya Seko mpe ya kusakumuna. Mpe beto ke kuzwa ve bampova ya kulunga.

¹⁸ Mutindu ba tubaka yawu kilumbu mosi na muntu ya lukumu, mwa basabala me luta, ti yandi lendaka zonza mbote pene ya bandinga yivwa ya kuswaswana, yandi kele ntangu yayi na kisika ya yandi mutindu konseye ya Mfumu ya beto ya luzolo ya yinsi, Dwight Eisenhower. Mpe ata ti lenda tuba bandinga yivwa, mbote-mbote; yandi tubaka, ntangu yandi kuzwaka Mpeve-Santu, yandi mekaka mosi na mosi ya yivwa, mpe ya vwandaka ve na bampova yina yandi lendaka kuzwa, kima ve yandi lendaka kutuba, mpe na yawu Nge pesaka yandi ndinga ya malu-malu samu na kutuba mpe kutonda Nge. Mpe beto ke kuwa mutindu yina, mpe, Mfumu; ti, na ntangu luzingu ke mana, ti mu banza beto ke zonza na ndinga yankaka, na yawu beto lenda tuba yina beto ke banza samu na Nge.

¹⁹ Ntangu yayi beto ke lomba, Mfumu, ti Nge ke sakumuna tabernacle yayi, pasteur ya yawu, ba-administrateur ya yawu, ba-diacre ya yawu, ba-associé ya yawu nyonso, bantu yina ke kwizaka awa, bayina ke kotaka mpe ke basikaka na myelo. Ti ba tala yawu ntangu nyonso mutindu ba sakumunaka yawu, kisika ya kupema, kisika bantu ya kulemba lenda kota na myelo ya yawu mpe kuzwa kupema mpe ngemba na myoyo ya bawu. Mpe ti muntu ya kubela lenda kota na mwelo, mpe kubasika na mavimpi ya mbote, samu na Mvwandulu ya Nzambi ya Ngolo nyonso Yina ke zingaka na yisi ya muludi ya yawu.

²⁰ Beto ke lomba, Mfumu, ti na kati ya ploglame yayi yina ke na kwiza ya . . . yina me yidama ntangu yayi, ti Nge ke kutana na kimvuka mpe ke kutana na bawu nyonso. Mpe kana ya ke sepelisa Nge mingi ti ya ke vwanda na kubambuka moyo ntangu nyonso na kisambu yina salamaka na kizinga yayi ya ntama, mpe lupangu ya matiti ya yimbi, kilumbu mosi; ti ntangu yayi ya me kuma mwinda, kisika ya kupema samu na bantu ya kulemba, samu na mvutu ya kisambu yina.

²¹ Ntangu yayi lemvokila beto na kima nyonso yina beto me sala, to me tuba, to me banza, yina vwandaka ya kuswaswana na luzolo ya Nge ya nene; mpe bambuka moyo, Mfumu, ya katukaka ve na bantima ya beto. Mu banza beto salaka kaka yawu na nsalulu ya beto to na bikoba ya beto. Kasi, na nswalu nyonso, Nge kuwaka beto. Ntangu beto monaka ti beto vwandaka na foti, beto vwandaka zola kufunguna yawu. Mpe beto zola ve kubumba na ntima ya beto, disumu ya nko, kuna beto zaba ti Nzambi ke pesa ve mvutu na bisambu ya beto; kasi ntangu nyonso ke funguna bifu ya beto.

²² Mpe beto ke lomba, Mfumu, ti Nge ke sakumuna, na suka yayi, bisika nyonso na yinsi, mutindu ba ke na kukembisa na kubambukaka moyo na Kilumbu yayi ya Bamama. Kasi bika

yayi kuvwanda kaka ve kilumbu ya bamama; ti konso kilumbu kuvwanda mutindu yina.

²³ Nzambi, pesa na suka yayi, bamama yina, bakento, bayina ke na kuyenga-yenga ntama na Nzambi, ti bawu ke kwiza na bawu mosi, na suka yayi, mpe ke zaba yina mpova *mama* yayi zola kutuba, “yandi yina me pesa luzingu.” Ti yandi bakula ti bambuma, ya kuvukana ya yandi na bakala ya yandi, kele bima ya fyoti ya santu yina Nzambi me tula na yisi ya nkengololo ya yandi. Na yina, Nzambi ke lomba yandi mvutu samu na ndongosolo ya bana yina. Mpe mutindu Masonuku ke tuba, ti, “Kento ya mbote, mpe mama, yina yandi kele, yina bana ya yandi ke pesa yandi lusakumunu.”

²⁴ O Mfumu, ntangu beto ke mona kilumbu yayi, ntangu bawu ke kwenda ntama mingi na Masonuku, mpe ke sala mutindu bibulu! Beto ke sambila, Nzambi, ti Nge pesa beto reveil ya mutindu ya ntama yina ke vutula bawu na kisika yina bawu fwana vwanda.

²⁵ Mfumu, beto zola ve, ata fyoti ve, kuzimbana na kutonda Nge samu na bamama ya kieleka, samu beto zaba ti beto kele na bayina ya mutindu yina bubu yayi; bamama ya mbote, ya kieleka. Nzambi, sakumuna bawu. Ba kele bimvwama ya nene samu na beto, mpe beto ke sambila ti Nge ke landila na kuvwanda na bawu, Mfumu, mpe ti bawu kuzinga na kyese mpe kumona mbuma ya kivumu ya bawu kusadila Nzambi.

²⁶ Mpe beto ke sambila, Nzambi, ti bayina me lwata rose ya mpembe na suka yayi, to fololo ya mpembe, samu na kutuba ti mama ya bawu me luta na lweka yankaka ya kisalu yayi bubu yayi; ti, Mfumu Nzambi, bawu pema na ngemba mpe bisalu ya bawu kulanda bawu. Pesa yawu, Mfumu.

²⁷ Ntangu yayi baka Ndinga ya Nge, Mfumu, mpe zonza na bantu, mpe pesa bawu ngolo, samu ti ya kele samu na yina beto me vukana awa; samu na kuwa Mvwandulu ya Nge, kuwa Ndinga ya Nge, mpe kusakumunwa; mpe kukatuka awa samu na kuvwanda babakala mpe bakento, bana ya babakala mpe bana ya bakento ya mbote, kulutila yina beto vwandaka ntangu beto kotaka. Beto ke lomba yayi na Nkumbu ya Yesu, Mwana ya Nzambi. Amen.

²⁸ Mu zola kutanga Ndinga ya Yandi ya kusakumuna. Na yawu ntangu yayi beto ke baka, na suka yayi, na Buku ya Ntete ya Corinthiens, mpe kutanga kitini ya kapu ya 15, kubanda na nzila ya 1.

Na zulu, bampangi, mu ke zabisa na beno nsangu ya mbote yina mu longaka beno, yina mpe beno kuzwaka, mpe na kati ya yina beno me telama;

Na yina mpe beno me kuzwa mpulusu, kana beno bumba na memwelu yina mu longaka na beno, kana ti beno me kwikila ya mpamba.

Samu ti mu pesaka na beno ntete ya nyonso yina munu mpe kuzwaka, mutindu ti Klisto kufwaka samu na masumu ya beto landila masonuku;

Mpe ti yandi kuzikamaka, mpe yandi vumbukaka dyaka na kilumbu ya tatu landila masonuku;

²⁹ Beno lendaka tuba, “Mpangi Branham, ya kele ve na kisika dilongi ya mumesanu samu na nsangu na Kilumbu ya Bamama.” Mbote, ya kele kieleka. Kasi, beno zaba, Nzambi kele ve ya mumesanu, mpe Yandi ke salaka bima na mutindu ya mumesanu ve.

³⁰ Mpe mu ke banza, mabanza, ya mama. Mpe mu kele na mosi na suka yayi, na lemvo ya Nzambi, kele dyaka awa na zulu ya ntoto na beto. Mpe mu ke vutula matondo samu na mama. Kasi mutindu ti beto ke kuzwa, mpe, lukutakanu ya kubeluka, mpe na kuzabaka ve ti mu ke vutuka dyaka na nkokila yayi, na yina mu vwandaka banza ti beto lendaka lenga kifwanukusu ya tablo yankaka.

³¹ Mama kele nene mingi. Beno zaba, yina ya ntete ke yambaka beno, na luzingu yayi, ya kele mama ya beno. Muntu ve lenda simba beno, samu ti beno me butuka, mpe yandi ke nata beno na yisi ya ntima ya yandi. Mpe yandi kele ya ntete na kuzaba beno, mpe ya ntete na, na luzingu yayi, na—na kusimba beno. Na yina, ntangu beno me butuka, yandi kele mosi ya maboko ya ntete yina ke simba beno mpe ke kusuna maza ya beno ya meso. Yandi kele mosi ya ntete na kubondila beno mpe na kuzola beno, mpe na kuyimbila beno mwa nkunga, na luzingu yayi, ya kele mama ya beno. Ntangu yayi, mu banza ti ya kele ve na lukumu ya kulutila yina beto lenda pesa na mama.

³² Mama kele ya ntete na mwana, mpe yandi kele na kizitu ya nene ya yina mwana yayi ke vwanda, ya ke vwanda na zulu ya mutindu mama yina ke banda mwana yina na nzila yina yandi fwana tambula. Mama kele na kizitu, na Nzambi, na kutula mwana yina na nzila ya mbote. Mpe mu banza ti ya kele samu na yina bamama kele na mwa kusimba mosi ya mutindu yankaka.

³³ Mu zaba mwana mosi ya bakala na mbanza yayi. Mu banza ti mama ya yandi kele awa na ntangu yayi. Mwana ya bakala kele na bamvula pene ya munu. Kasi mu ke tuba yayi ve samu na kunyongisa mama yayi; samu ti yandi kele na bampasi mingi, mutindu bamama nyonso. Kasi mwana ya bakala yina ke kunwaka, mpe yandi ke kunwa mingi. Mpe ntangu yandi ke kulawuka malafu mingi, yandi ke vutuka na yinzo mpe ke mata na mbeto na mama ya yandi mpe ke tula maboko ya yandi na ziunga ya mama. Mpe mwana ya bakala yina kele na mitekolo. Kasi ya kele kaka na kima na zulu ya kubondila ya mama, ya ke monana kuzwa kisika yankaka kulutila kima nyonso yankaka yina lendaka simba; yina kele, na luzingu yayi, na mutindu ya kimuntu.

34 Beno zaba, muntu mutindu Moise, yandi... Kana mu lendaka ndima kima mosi na nkadulu ya yandi, ya vwandaka samu ti yandi vwandaka na mama yina Nzambi fidisaka. Beno zaba ya vwandaka yandi yina sambilaka, Jokebed, mpe vwandaka na nsatu mingi ya bebe yayi. Mpe ntangu yandi butukaka, yandi vwandaka yandi yina yimbilaka yandi, mpe nyongutaka yandi mpe tungaka nzaza mpe kotisaka yandi na bambaamba, na yina ntima ya yandi ya mawa vwandaka bukana. Mwa bebe ya yandi mosi, mpe ya vwandaka mwa kizizi ya kulutula kitoko yina vwandaka na yinza ya muvimba. Mpe mutindu mama ke zolaka bebe nyonso! Kasi na kumona mwa bebe yayi ya mutindu yankaka.

35 Mpe kuna, na kati ya ntima ya yandi, yandi zabaka ti yandi butukaka samu na lukanu mosi, mpe na yina kunata yandi mpe kutula yandi na dibulu ya nene ya bangandu, kuna na nzadi. Na lukwikilu yandi salaka yawu, na kuzabaka ti Nzambi vwandaka na lenda ya kukeba yandi; mpe samu na kukotisa zola ya mama, mpe ksalu ya nkadulu ya lukwikilu ya yandi. Samu ti lukwikilu yawu mosi ke vwandaka ve na zulu ya zyelo yina ke dyamisaka na yina yawu lenda mona; lukwikilu ke pemaka kaka na zulu ya ditadi yina ke ninganaka ve ya Ndinga ya Seko ya Nzambi. "Samu ti na nzila ya lukwikilu," me tuba Masonuku, "mama yayi salaka yayi."

36 Mpe lukwikilu lenda baka kutelema ya yawu na zulu ya ditadi, ti bitembo kubula balufulu, mpe kutala mbala mosi na kizizi ya lufwa mpe kuzaba ti ya ke vwanda kaka na mwa ntangu fyoti, kasi lukwikilu lenda tala na simu ya yankaka ya nzadi na Yandi yina tubaka, "Mu kele mvumbukulu mpe Luzingu," mpe ke kuwa mpe ve makelele ya bitembo.

37 Ya kele mutindu ya lukwikilu yina mama ya Moise vwandaka na yawu. Yandi longaka yandi mpe yandi kulisaka yandi na yinzo ya kimfumu ya Pharaon, na kulongaka yandi ti yandi butukaka samu na lukanu mosi, ti Yehowa pesaka mvutu na kisambu ya yandi. Mpe, yandi... yandi zolaka kuzwa ve mulongisi ya kulutula mbote. Ya kele yina sadisaka na kusala nkadulu yina vwandaka na Moise.

38 Mu banza ti ya vwandaka Abraham Lincoln yina mbala mosi salaka nsamunu mosi mutindu yayi... .

39 Ntangu yayi, mu kele Demoklate to Republicain ve, mu ke kaka... Mu kele Muklisto. Na yina, mu banza ti lweka mosi lendaka tuba ve kima mosi na kuteleminaka lweka yankaka; ya kele nyonso ya kubeba. Kasi, Abraham Lincoln, na mabanza ya munu, vwandaka mosi ya... mpe vwandaka mosi ya kulutula nene ya Bamfumu ya yinsi yina Etats-Unis yayi me kuzwaka ntete; kukotisa na Washington, mpe nyonso yina.

40 Samu ti, Abraham Lincoln kuzwaka kubanda ya yimbi. Yandi vwandaka mputu. Yandi vwandaka ve na lufulu, nyonso

mutindu ndongosolo, to—to kima mosi ya nene, to mbongo, to kima yina lendaka sadisa yandi, mutindu Washington. Washington vwandaka diplome ya nene, mpe yandi—yandi zabaka; yandi vwandaka muntu ya mayele mingi, muntu ya nene, na kubanda. Kasi Lincoln basikaka na mwa yinzo mosi ya bayinti, na yisi ya bantoto ya nene ya Kentucky, mpe na ata dibaya na yisi ya mwa yinzo ya ntama ya bayinti yina, yina me vwanda mutindu lubambuku awa na Louisville ntangu yayi. Kasi, na kuvwandaka muntu ya nene yina yandi vwandaka, mpe yandi zolaka longuka na kusonika, na zulu ya ntoto yina yandi kusabaka, na kukuna masangu.

⁴¹ Kasi mu lendaka lutisa yayi na bantwenya. Beno zaba ti Abraham Lincoln kuzwaka ata mbala mosi ve buku na luzingu ya yandi, tii yandi kuzwaka bamvula makumi zole na mosi, kana kaka ti Biblia mpe buku ya Fox ya bamartyr? Beno me mona, yina beno ke tanga ke sala nkadulu yina beno kele. Kukondwa ntembe ti beto kele na nkonga ya bantu ya kidi-kidi bubu yayi; mwa bamagazini ya ntama ya fiksyo, mpe ya kidi-kidi mpe ya buzoba, kele ya kutanda na zulu ya bakioske ya bazulunale. Yandi kuzwaka Biblia mpe buku ya Fox ya bamartyr. Beno tala yina yawu salaka yandi!

⁴² Kasi na ntwala ya nyonso yina, kilumbu mosi yandi salaka nsamunu ya mutindu yayi. Yandi tubaka, “Kana ya lenda vwanda na kima ya mbote yina me tadila munu, ya kele samu na mama ya santu,” yina kulisaka yandi na kusadilaka Mfumu.

⁴³ Beno me mona, mwana ke kuwaka mama ya yandi; ya kele na kusimba mosi na zulu ya mama yina, ti mwana ke kuwa. Ntangu yandi kele ya kunyonga, yandi ke kwenda na mama na kuzwa ngolo ntete yandi kwenda na tata. Samu ti, yandi vwandaka ntete na yandi, beno zaba. Mpe ya kele na dikabu mosi yina Nzambi pesaka mama, samu na kuvwanda mutindu yina; mu zola kutuba mama ya kieleka. Ntangu yayi, mu ke kwikila ti bamama kele bantu ya santu mpe fwana kuzwa lukumu.

⁴⁴ Kasi mu ke kwikila ti, mutindu Bilumbu ya Bamama, mutindu yayi, kele mutindu ya mayuya, samu na kusala mbongo mingi na kutekisa bafololo mpe nyonso. Kasi kilumbu ya mama zolaka vwanda konso kilumbu. Ve kutinda yandi kikunku ya bafololo na Kilumbu ya Mama, kasi kuzola yandi mpe kukipe yandi mpimpa mpe ntangu, bilumbu nkama tatu na makumi sambanu na tanu mvula ya muvimba. Kasi, ya kieleka, yinza ya komerse kele na kusimba ya nene na bima ya mutindu yayi, mpe yawu—yawu—yawu ke bebisa bumama.

“Oh, mbote, Kilumbu ya Bamama yina lutaka mu tindaka mama kikunku ya bafololo.”

⁴⁵ Yandi ke zola mingi, kulutila kuzola, ti beno vwanda kaka mpe kusolula na yandi kaka mwa ntangu fyoti, beno sonika yandi mwa mukanda, kubula yandi mwa fyoti na dipeka, kupesa

yandi mwa bize na ditama, kutuba na yandi ti beno zola yandi. Ya ke sala mbote mingi kulutila bafololo nyonso yina beno lenda kwenda sumba na muntu ke tekaka bafololo. Ya kele ya kieleka.

⁴⁶ Mu banza ti ya vwandaka na Balutumu Kumi, ya Cecile DeMille yina kufwaka, yina sonikaka mpe tulaka na kitala-tala na yinza ya sinema mosi ya bima ya kuyituka. Mpe ntete ba tula yawu na kisalu, to ba basisa, Cecil DeMille bokilaka Oral Roberts mpe Demos Shakarian, mpe nkonga ya milongi ya Nsangu ya mbote ya Muvimba, mpe nataka bawu na basitidyo ya yandi mosi mpe lakisa bangunga yiya ya Balutumu Kumi, mpe yufulaka bawu dibanza ya bawu samu na yawu. Nzambi kupemisa moyo ya yandi ya ngolo!

⁴⁷ Mpe ntangu mu monaka yawu, ti mu talaka yawu, mpe mwa kima mosi ke vutukilaka munu ntangu nyonso. Kana mingi na kati ya beno me monaka yawu, ya vwandaka ntangu mwana ya kento ya Pharaon...na manima Moise zabaka ti yandi vwandaka Hebreux, mpe yandi bakaka lukanu ya kuzinga na bantu ya yandi. Mpe mama ya yandi yina kitoko ya ntama, kubebaka, vwandaka ya kuvwanda kuna na bansuki ya mpembe mpe kizizi ya yandi na mifutu, yandi vwandaka ya kuvwanda na kiti ya ntama; kifwanukusu ya mama. Mpe mwana ya kento ya Pharaon kwizaka. Mpe yandi tubaka, “Mu kele mwana ya nani, na mutindu nyonso?”

⁴⁸ Mpe ntangu ba talisaka, ti Jokebed vwandaka mama ya yandi ya kieleka. Mwana ya kento ya Pharaon, na kupakula mpe nyonso ya yandi, mpe nyonso ya kuyilama; yandi tubaka, “Kasi, tala! Yandi lendaka vwanda mwana ya nge ya bakala, kasi,” yandi tubaka, “Mu me pesa yandi bimvwama mpe bunene. Nge lendaka pesa yandi kima yankaka ve kasi mabulu ya poto-poto.”

⁴⁹ Kasi mama yayi ya kiboba ya bansuki ya mpembe tubaka, “Kasi mu pesaka yandi luzingu.” Yina ke sala luswaswanu. “Mu pesaka yandi luzingu.” Nzambi pesaka yandi Luzingu ya Kukonda nsuka. Mutindu kieleka, ya kele mama!

⁵⁰ Bantangu mingi bantu ke tubaka na munu, bambala mingi ntangu nyonso na ba-campagne ya munu, mu “ntangu nyonso ke longaka na zulu ya mvumbukulu.” Mpe mu me tanga dilongi mosi na suka yayi, kapu 15 mpe na nzila ya 4 ya Ntete ya Corinthiens, na zulu ya mvumbukulu.

⁵¹ Kasi, beno me mona, mutindu bawu ke tula mama bubu yayi, kele mbungu ya bafololo yina me vwanda pene-pene ya mama ya kiboba, yina me nuna mpe lenda telama ve, mu banza, mpe ya kulemba, mpe na bansuki ya mpembe, mpe na mifutu, mpe ya kuvwanda na kiti. Ya kele kieleka ya kulunga. Kasi mu zola kunata dibanza ya munu mpe kuyema beno tablo yankaka ya yina mama kele.

52 Muntu mosi tubaka, “Nge ke longaka mingi na zulu ya mvumbukulu. Pene konso Nsangu ya nge kele na kima na zulu ya mvumbukulu.”

53 Kasi, ya kieleka. Ya kele—ya kele kisika ya ntete ya kupema ya Nsangu ya mbote. Ata yina Yandi sala, kana Yandi kuvumbukaka dyaka ve na lufwa, kuna nyonso ya yawu vwandaka ya mpamba. Yawu, samu na munu, ke siamisa ti Yandi vwandaka Nzambi. Ke siamisa konso nzonzolo yina Yandi salaka; mvumbukulu! Mpe ya kele mpe kisika ya kupema ya moyo. Ya kele kisika ya kubanda. Ya kele kubyadisa ya kukatula kyadi ya beto.

54 Mpe ntangu beto ke mona ti Yandi vumbukaka na lufwa, yawu ke tula beto, na binwaninu ya Nsangu ya mbote, na ntwala ya mvita, samu na kubaka kisika, na kunwana. samu, beto zaba ti Yandi tubaka, “Yandi yina ke zimbisa luzingu ya yandi samu na Munu ke kuzwa dyaka yawu.”

55 Mpe mu banza ti ya kele kubyadisa ya nene ya Nsangu ya mbote ya Muvimba, ya kele mvumbukulu, mpe bansilulu ya yawu ya Kinzambi, mpe kukatula kyadi yina yawu ke pesaka na bayina ke salaka kivuvu na yawu. samu ti, ya silaka kuvukana ya nene ya kuvukana dyaka ya beto kintwadi. Ya silaka, mpe kuzimbana ya disumu nyonso. Ya silaka kuzimbana ya bifuma nyonso, ya bampasi nyonso yina beto me kuzwa na yayi, yina beto me lutila, na luzingu yayi. Ya silaka, mpe kufwa ya nyonso ya yawu. Ya silaka ti mpe lufwa ke zimbisa kusimba ya yawu, mpe beto ke vumbuka na kifwani ya Yesu. Na yawu, samu na dibanza ya munu, mvumbukulu kele ya kulutula nene na bansilulu nyonso ya Masonuku. Ya kele kisika ya kangaka yawu.

56 Mpe Paki ya nsuka, ntangu mu vwandaka longa na zulu ya bima tanu ya:

Na kuzingaka, Yandi zolaka munu; na
kufwaka, Yandi vuukisaka munu;
Na kuzikamaka, Yandi nataka ntama masumu
ya munu;
Kasi, na kuvumbukaka, Yandi nungisaka
munu ya mpamba kukondwa nsuka.

57 Beno tala Kilumbu samu na munu, Kilumbu yina ya nene ya bilumbu! Mpe kumona yina yawu zola kutuba, samu na beto nyonso, na mvumbukulu, na yina beto ke sala mpe ke vingila na Kilumbu yina ya kusakumuna ya bilumbu!

58 Ya ke pesa beto nsilulu ti kilumbu bamama ya kununa yayi, ya kulemba, yina me lemba, na bansuki ya mpembe, na mavimpi ya yimbi ke soba. Ve kaka mama yina ke vwanda kuna, yandi mosi, kasi dibuta ya yandi nyonso na yandi.

59 Mpe wapi kilumbu ya ke vwanda! Wapi ntangu ya ke vwanda, na ntangu beto ke tala bizizi ya bayina beto zolaka kieleka mingi! Wapi luswaswanu na suka yina, ntangu beto ke

mona bankundi ya beto ya luzolo, mpe—mpe kutala mbote yina bawu ke vwanda na ntangu yina! Ba ke katula bampasi nyonso. Bidimbu nyonso ya bampasi ke zimbana. Ata matama dyaka ya kulemba ya lufwa. Ata maza dyaka ya meso. Mvumbukulu silaka nyonso yayi. Ya ke vwanda dyaka ve na mafwa. Ata kubondila dyaka bebe na ditama, yina kele mutindu kitini ya ditadi; kisika muntu ya yinzo ya bamvumbi me tula mananasi, me bongisa mpe pakula, mpe nyonso yina, samu na kutala muntu. Ya ke vwanda dyaka ve na nsatu ya yawu, kuna.

⁶⁰ Na yina mu ke banza ntangu beto ke mona bawu ya kutelama kuna, baya beto ya luzolo, bamama ya beto ya luzolo, makanda ya beto, bankundi ya beto nyonso; mpe kumona bawu na banzutu ya bawu yina ke kufwa ve, banzutu ya bawu ya mazulu; na kutalaka bankadulu ya bawu, na kumonaka mutindu bawu tambulaka bawu mosi na kulemba mpe mutindu ya swi, kukondwa dyaka kudasuka to kunyonga. Kumona bawu kuna kutelama na kifwani ya Mfumu Yesu, yina ke vwanda kilumbu mosi ya kitoko.

⁶¹ Mpe mosi na mosi ya beto, na kati ya mabanza ya beto, ke na kuingila mpe zola kutala ngunga yina ya kukatula kyadi, ntangu beto ke kutana na yawu. Mosi na mosi ke na kubanza na ya bawu ya luzolo, ya lendaka vwanda mama ya bawu yina kufwaka. Mpe wapi kilumbu ya ke vwanda, ntangu beno ke mona dyaka yandi! Mpe papa, mpe mpangi ya bakala, mpe na . . . bawu nyonso ya luzolo, wapi kilumbu ya ke vwanda!

⁶² Mu ke na kubanza, mpe, na ntangu kaka yayi. Mu ke na kubanza na dibuta ya munu, yina ya ke zola kutuba samu na munu na Kilumbu yina.

⁶³ Mu ke banza ti, na suka ya mvumbukulu yina, ya lendaka vwanda muntu ya ntete ke kwiza kutana na munu ke vwanda Sharon ya munu ya fyoti. Ve, yandi ke vwanda ve ke na kutekita. Dyabulu yina lenda ve kukota na kisika yina. Ata meningite lenda simba Yinsi yina. Yandi ke vwanda dyaka ve na kusalaka kidimbu na diboko samu na kupepa munu bayo. Mwa meso yina, ya bleu ke vwanda na kubina na yina yandi tanda maboko ya yandi mpe boka, “Papa!” Mu ke vwanda na kyese na kumona yandi, na kuzaba ti yandi ke kufwa dyaka ve; kuzaba ti nyonso me mana, ya kele samu na yina mu ke longaka mvumbukulu na ngolo nyonso.

⁶⁴ Na manima mu ke mona mama ya yandi, mama ya Billy, mwana ya munu ya bakala. Mpe mu kele na mabanza mingi ya kukangama kuna. Mu ke bambuka moyo ntangu mu vwandaka nata yandi; to Tata Combs, na zulu awa, vwandaka nata yandi ya mbala ya nsuka, mpe mu vwanda landa yandi, na ditoma. Na yina beto kulumukaka na Bala-bala ya Sambwadi, kaka kuna; Billy, vwandaka na bangonda kumi na nana.

65 Mutindu ti ba vwandaka basisa yandi na bala-bala, mpe kubika mama ya yandi kumona yandi. Mpe yandi vwanda lala mpe kudila, mpe kutala bebe ya yandi, kasi yandi zolaka belama ve na yandi.

66 Mpe kuna na nzila, muntu ya yinzo ya bamvumbi kwizaka mpe kwendaka na Bala-bala ya Sambwadi. Mama awa vwandaka keba yandi na ntangu yina. Mpe yandi vwanda vwanda kuna na nganda ya lupangu, na mwa kupe, mpe na mwa yimpu mosi ya mbwaki ya kubaluka na lweka ya yintu ya yandi. Mpe kuna mama yina, ya kulala na zulu ya mbeto ya bambevo, na manima ya ambulance yina, vwandaka tala munu, ntangu yandi monaka bebe ya yandi ya kutelama na kati ya lupangu, kuzabaka ti yandi vwandaka sala zyetolo ya yandi ya nsuka; yandi vumbukaka na mbeto yina ya bambevo mpe bokaka, mpe yandi tandaka diboko ya yandi ya mukwa, samu na kuyamba bebe ya yandi yina vwandaka na kati ya lupangu. Kasi yandi zolaka ve kuzwa yandi.

67 Oh, ya ke vwanda kyese na kumona yandi na kilumbu yina. Ve, yandi ke vwanda ve na maboko ya mukwa yina, to dyaka ti matama ya yandi ke vwanda ya kukota. Kasi yandi ke telama na kitoko ya mazulu ya kento ya ntinu ya Mazulu, mpe ya mama. Meso ya yandi ya ndombe, ya ndombe mutindu mapapu ya ngoy-ngoy, ke vwanda na kubina na kyese. Yandi ke vwanda dyaka ve yandi nyonso ya kukondama; kisika, dyabulu yina ya Tuberculose ke kota ata fyoti ve na Yinsi yina. Kasi, muntu yina lenda kufwa ve, ke telama mutindu Yandi.

68 Mu banza, kuna, na manima yina ke kwiza kutana munu ke vwanda Edward, yandi yina beto ke bokilaka “Humpty,” na nkumbu ya nkufi. Yandi vwandaka ya ntete na kati ya sieni ya nene ya bima yivwa, sieni ya dibuta Branham. Yandi vwandaka kitini ya ntete ya kuzengana; yina vwandaka landa munu. Mu ke mona Edward kukwiza na munu na mbangu. Ata ti, yandi kufwaka mutindu mwana ya bakala, ya bamvula kumi na yivwa. Mpe na yina mu ke baka yandi na diboko ya yandi, mu ke ndima ti beto ke vwanda na mambu mingi ya kuzonza, na ntangu ya beto ya bumwana, samu ti beto vwandaka bankundi. Beto vwanda kabukaka ve. Yandi vwanda bikaka munu kulwata kazaka ya yandi, mpe—mpe—mpe nyonso, mutindu bampangi ya kieleka ke salaka. Ya ke vwanda kyese mingi na kumona dyaka yandi.

69 Mpe mu ke kuwa yandi kutuba kima mutindu yayi, “Nge kuzwaka ndinga ya munu, Bill? Nge vwanda salaka na ranch ya bibulu, na ntangu mu vwandaka katuka ntoto. Kasi na lupitalu, mu tindaka nsangu, “Tuba na Bill nyonso kele mbote.”

Mu ke vwanda na kyese ya kutuba, “Yinga, mu kuzwaka nsangu ya nge, kuna na matiti.”

70 Na manima, mu banza, ke landa na kukwiza ke vwanda papa ya munu. Yandi vwandaka kitini yina landaka na kukwenda, mpe...Ve.

71 Mu banza ti Charles vwandaka kitini yina landaka, leki ya bakala. Yandi kuzwaka dikubu ya tomabilu ntangu yandi vwandaka kaka mwana ya fyoti. Yandi vwanda bendaka ntangu nyonso dikulu ya yandi ya kibakala, na yina yandi vwanda tambula. Kasi, beno zaba, ntangu mu ke mona yandi, yandi ke benda dyaka ve dikulu yina. Yawu nyonso ke mana, yandi ke telama na kitoko ya buntwenya.

72 Mpe yandi ke tuba na munu, kima mutindu yayi, na yina yandi ke seka fyoti. Yandi ke tuba, “Yinga, Bill, ya kele na ata kisumbula awa. Mpe mu ke bambuka moyo na nkokila yina ntete mu kuzwa kisumbula ya tomabilu, nge zonzaka na munu, ya kutelama na mwa arche ya yinzo ya beto ya fyoti ya mpamba” mpe mu ke na kutala na zulu, na ntangu yayi. “Nge zonzaka na munu na yina me tadila Mfumu, kaka bangunga fyoti ntete mu kwenda. Mpe nge vwandaka longa na chaire na ntangu mu kwendaka.”

73 Na manima ke kwiza papa. Oh, mu lenda mona yandi. Ata ti yandi pesaka munu bitumbu ya mpasi, kaka kieleka yina mutindu mu zolaka kuzwa, kasi mu ke mona nsuki yina ya ndombe ya makolo, kulezima mingi kulutila na ntama, na kilumbu yina. Mpe yandi ke tala munu, mpe ke tuba, “Mwana ya munu ya bakala, nge zaba, Papa ke telama dyaka mbala mosi ve, na mesa, na nzala, samu na kubika bana ya yandi kudya, samu ti awa beto kele na mingi. Ya kele ve na nsatu ata mbala mosi ve awa.”

74 Kumona yandi ntangu yandi vwandaka sala, mpe samu na ba-cent makumi tanu to makumi sambwadi na tanu na kilumbu, mpe kuna vwandaka telama na mesa samu bana kudya, vwanda vutuka dyaka na kisalu. Mpe yandi vwandaka sala mingi ti kinkuti ya yandi vwandaka kangama na manima ya yandi, mpe mama zolaka zenga yawu na sizo.

75 Mu ke kuwa yandi kutuba kima mutindu yayi, “Bill, nge ke bambuka moyo na nkokila yina ntangu nge na Mpangi ya bakala George kwizaka sambila samu na munu na ntangu mu vwandaka kwenda? Nge zaba, mu tubaka na mama ti ya vwandaka na Bawanzio zole ya mpembe ya kutelama na mbeto, mpe wanzio ya mbwaki na makulu. Mpe wanzio ya mbwaki vwandaka meka na kuzwa munu, kasi Wanzio ya mpembe vtelamaka na kati-kati. Na nsuka bawu nataka munu na Yinzo.”

76 Na manima, dyaka, yina landaka na mulonga na kukwenda, to yina kwendaka, ke kwiza Howard. Mu ke mona Howard; mutindu beto sabukaka bayinsi kintwadi, bisika nyonso; ba bokilaka yandi na kuvwanda mulongi; muntu ya nene, kasi bampangi ya yandi kumaka kikaku ya yandi. Disolo ya nsuka

mu kuzwaka na yandi, yandi tubaka, “Ntangu mu ke kwenda, Bill . . .”

⁷⁷ Mu—mu monaka yandi kukwenda, na nzila ya vision, pene ya bamvula yiya ntete yandi kwenda. Mu tubaka na yandi ti mu monaka Papa kusala kidimbu na ntoni ya yandi mpe tubaka ti vwandaka yina vwandaka landa.

⁷⁸ Mpe yandi tubaka, “Mu zola ti nge sala kima mosi samu na munu.” Yandi tubaka, “Mu me bebisa luzingu ya munu. Mu me kwelana mpe nyonso yina. Mu—mu zaba ve yina me salama.”

Mu tubaka, “Nge ke kwikila na Yandi, Howard?”

⁷⁹ Yandi tubaka, “Na nyonso yina kele na kati ya munu, mu ke kwikila Yandi.” Na kutala bilumbu zole to tatu ntete yandi kwenda, yandi salaka ngemba ya yandi na Nzambi, na ntwala ya Mpangi Neville mpe bayankaka kuna. Mpe yandi tubaka, “Ya kele na kima mosi mu zola ti nge sala. Ntangu mu ke kwenda, Bill, sala ti bayimba samu na munu, *Yandi Ke Bakula, Mpe Ke Tuba, “Nge Me Sala Mbote.”*”

⁸⁰ Mu banza, ntete mu ningisa diboko ya Howard, mu ke kuwa yandi kutelema mpe kutala munu, mpe kutuba, “Bill, Yandi bakulaka.”

⁸¹ Na manima ya yina, ke kwiza Mpangi ya bakala Seward, Mpangi ya bakala Frank Broy, Mpangi ya bakala George DeArk. Oh, mvumbukulu zola kutuba mingi samu na munu. Mu ke na kovingila mingi na ngunga yina ya nene ya kubyadisa. Mpe mutindu Nsemo ke banda na kukuma mingi, “Beto ke zaba mutindu beto zabanaka.” Beto ke bakula, mpe—mpe beto ke bambuka moyo na bayina beto zabaka mpe bayina vwandaka kuna.

⁸² Mpe—mpe mingi, ya ke vwanda na bantu mingi kuna yina beto banzaka mpe ve ti zolaka vwanda kuna. Samu ti, beno zaba, ya kele na ntangu yina, ti mu ke kwikila ti “dimpa yina beto me losa na zulu ya maza ya bantu, ya mabanza ya mvindu, ke vutuka na beto na Kilumbu yina.” Ntangu beto ke mona bandandu ya kimbangi ya beto, na bantu yina beto bakulaka ve kisalu ya bawu na ntwala ya Yawu, ke vwanda na kutala kuna. Wapi Kilumbu ya ke vwanda!

⁸³ Mpe na manima, mpe, bankuna yina beto kukunaka, na kuzabaka mpe ve yina yawu ke sala, kasi awa yawu kele. Ba ke buta bambuma ya ntalu, mpe beto ke mona yawu na Kilumbu yina, bayina ya beto ya luzolo mpe makanda ya beto yina tumamaka ve.

⁸⁴ Mpe mu ke banza na mafunda yina mu me mona kundima, yinga, na mafunda ntangu yayi ke na kulandila, mpe yina vwandaka ministele ya bawu. Oh, ya ke lomba kulutula mvumbukulu. Ya ke lomba Seko, samu na kumona nyonso,

kupesa bambote mpe kubakula bima yina mu me zaba ntangu yayi ve.

⁸⁵ Ya ke vwanda na bamama ya kununa yina kele na bansuki ya mpembe, samu na yina beno ke na kulwata bafololo yina ya mpembe bubu yayi, yina ke mona beno, mpe bawu ke vwanda kitoko. Bawu ke monana ve na mbungu ya bafololo, to mwa foto ya kiboba ya bansuki ya mpembe; kasi na mutindu mpe kitoko ya mvumbukulu, bawu ke telama na kifwani ya Klisto, banzutu ya bawu ya mazulu, bantwenya mpe ya kitoko kukonda nsuka. Ya kieleka, ya kele kupema. Yawu yina Kilumbu ya bamama yina mu ke na kuingila. Yawu yina kubyadisa. Ve dibulu ya singa ya luketo, kasi kubyadisa ya moyo, samu ti Nzambi me soba yandi!

⁸⁶ Mu ke banza na mama ya munu mosi, yina me nuna mpe me lemba, mpe ke tekita na paralysie. Yandi ke vwanda ve na kusalaka yawu Kilumbu yina. Ya ke vwanda mutindu yankaka kuna. Mpe Nsemo yina ya nene ke banda na kukuma mingi, na yina beto ke banda na kutala na nziunga, mpe selekele ya nene ke vwanda ya kulutilla nene mpe ya kulutilla nene mpe ya kulutilla nene. Yawu nyonso ke lakisa kaka kubelama ya Yesu. “Mpe na manima ya mwa ntangu fyoti,” mutindu nkunga ke tuba, “mpe mu ke mona Yesu na nsuka.”

Yandi ke vingila munu, Yesu, ya mbote mpe ya kieleka.
Na Kiti ya Yandi ya kimfumu ya kitoko Yandi ke yamba munu na Yinzo
Na manima kilumbu yayi me luta.

⁸⁷ Na yina mutindu beto ke mona Yandi, mpe beto ke vwanda ve mutindu beto kele ntangu yayi. Beto ke—beto ke zaba mutindu ya kuzola dyaka Yandi. Beto ke vwanda ve na boma; samu ti, beto ke vwanda mutindu Yandi. Mbote, Yandi ke vwanda mpangi mukudi ya kulutilla samu na beto kulutilla yina Yandi kele ntangu yayi. Beto ke bakula Yandi mbote-mbote. Samu ti, beto kele ntama mingi, na kati ya banzutu yina ke kufwa; kuna beto ke kuzwa nzutu mutindu nzutu ya Yandi ya nkembo. Beto ke zaba mutindu ya kusambila Yandi. Mpe ntangu beto ke mona yina Mvwandulu ya Yandi me sala samu na beto, me soba beto; na kiboba na ntwenya, bifuma nyonso me sungama. Oh! Beto ke bakula na yina samu na yinki ngolo ya Yandi belusaka beto.

⁸⁸ Bakyuvu yina me vwanda na mabanza ya beto, “Wapi mutindu Yandi lenda sala yawu? Yinki *yayi*?” Na mutindu mosi, na mutindu ya ngitukulu, yawu nyonso ke zimbana. Mazita yina vwandaka ya kukangama na manima ya mabanza ya beto, “Ya ke vwanda yayi? Wapi mutindu ya lendaka vwanda?” Na mutindu mosi, to yankaka, misapi ya ngitukulu ke zibuka, ke zibula mazita yina, mpe ya ke zimbana nyonso na yimpu ya nene ya zola.

⁸⁹ Kuna beto ke mona Yandi. Kuna beto ke vwanda mutindu Yandi. Kuna beto ke sambila Yandi. Kuna beto ke mona mama mutindu Nzambi zola beto mona yandi.

Mama ke vwanda ve ya kulunga Kuna kukondwa dibuta ya yandi.

⁹⁰ Samu, ntangu ya kulutila nene ya luzingu ya yandi nyonso kele kumona bana ya yandi pene-pene ya mesa, mpe bawu nyonso na mavimpi ya mbote mpe kyese; mpe—mpe—mpe kumona yandi kumwangisa kafe, to nyonso yina yandi ke sala, mpe kulamba madya ya nkokila, mpe yandi mpe papa ya kuvwanda kuna. Mbote, yayi kele ntangu ya kulutila kitoko na luzingu ya mama, kumona bana ya yandi nyonso na yinzo.

⁹¹ Ntangu yayi, beno kondwa ve, beno kondwa ve na Kilumbu yina. Ti sieni ya nene ya dibuta ya beno kukangama kintwadi, kitini na kitini. Ti konso pine kuvwanda na kisengo. Kuna na ntangu beto vwandaka na mabuta ya beto mpe bimvuka, na lweka yankaka ya mazulu ya Seko, wapi mutindu ya Kilumbu ya ke vwanda! Kuna beto ke bakula.

⁹² Yandi vwandaka Yandi yina pesaka nsilulu yayi, na Apocalypse ya 1, kisika Yandi tubaka, ti, “Mbele ya yinda ya meno balweka zole basikaka na yinwa ya Yandi.” “Ba bokilaka Yandi Ndinga ya Nzambi.” Mpe ya vwandaka na bikoba mosi yina, ti tubaka, “Mu kele Yandi yina kele moyo, yina vwandaka ya kufwa; mpe Mu kele moyo ntangu nyonso.” Na bikoba mutindu mosi yina, na Santu Jean 6, makumi tatu na . . . ya ke tuba yayi, ti, “Mu ke zimbisa kima mosi ve, kasi mu ke vumbula yawu dyaka na bilumbu ya nsuka.” Ya vwandaka Yandi yina pesaka nsilulu; bikoba mosi yina ya ntalu. Yandi kele Yandi Yina ke vuukisaka beto, Yina ke belusaka beto, Yina vulusaka beto, mpe Yina ke vumbula beto na kilumbu ya nsuka.

⁹³ Kana beno kele mwa kitini yina ya kulemba yina me kabula dibuta yayi ya nene na Kilumbu yina, ti Nzambi ya Mazulu, na suka yayi, na mutindu mosi na mutindu ya ngitukulu, kuzibula mwa mazita yina vwandaka ya kukangama na mabanza ya beno, mpe kumonisa beno zola yina Yandi vwandaka samu na beno, mpe ti beno kwiza na lembami samu na kusadila Yandi.

Na yina beto ke banza na bima yayi, beto sambila.

⁹⁴ Kaka ntete beto sambila, mpe beno kele na bayintu ya beno ya kukulumusa, mu ke lombi beno. Beno ke zola, na Kilumbu ya Bamama yayi, kupesa dyaka baluzingu ya beno mbala mosi na Yandi, na kuvingilaka na mvumbukulu yina? Beno zola kutelemisa maboko ya beno na Yandi? Na yina muntu nyonso . . . Nzambi sakumuna nge.

⁹⁵ Ya kele na musumuki yina kele awa ntangu yayi, yina ke tuba, “O Nzambi, mu me kangama ntete ve na kitini yina. Mu kele yandi yina ke kondwa yina ke vwanda ve kuna ntangu mama ke vwanda na kusosa bisika nyonso na Nkembo. Mu ke

vwanda ve kuna, samu ti mu me sala ntete ve ngemba ya munu na Nzambi. Mu kele ve na kivuvu ya Luzingu ya Seko na kati ya munu. Kasi bubu yayi mu—mu zola kusala yawu”? Beno zola kutelemisa diboko ya beno, kutuba, “Sambila samu na munu, Mpangi Branham, na ntangu yayi. Mu zola ti ba bambuka munu moyo na kisambu, samu ti mu kele na baya ya luzolo na simu yankaka ya mubu, na mubu ya Luzingu, mpe mu zola kutana na bawu”? Beno telemisa maboko ya beno.

⁹⁶ To muntu yina me vutuka manima, mpe zola kuvutuka na kilumbu yayi, mpe kutuba, “Mfumu, mu me kukipesa dyaka munu mosi na Nge; mu ke kwiza vutula ngwisani ya munu na Nge,” beno zola kutelemisa maboko ya beno?

⁹⁷ Tata ya beto ya Mazulu, mutindu ya ke na kubelama, kilumbu yayi ke sala kilumbu mosi pene-pene ya dyambu ya nene yina. Mpe ba me tuma beto na ngolo nyonso, konso mvula, na kumona kutalisama yayi.

⁹⁸ Mutindu bantu vwanda kwendaka na Jérusalem na Kilumbu ya Pentecote, mpe samu na kukatula mvindu ya tabernacle mpe ya sanctuaire, mpe—mpe dikabu ya munkayulu ya disumu; konso mvula ba vwandaka bambuka moyo, ntangu mwana-dimeme yina kufwaka kuna, ti ya ke vwanda na ntangu yina Mwana-dimeme ya Nzambi ke kufwa, samu na kufwa makwela na disumu. Konso ntangu yina mwana ya kibulu yina vwandaka boka, mpe menga vwanda mwangana na zulu ya maboko ya bawu, ba vwandaka bambuka moyo ti ya ke vwanda na ntangu mosi ya ke vwanda na Mwana-dimeme ya Nzambi, yina ke boka, “Eli, lama . . . ? Eli, lama . . . ?” na kulunsi.

Mu ke sambila, Nzambi, ti mutindu beto ke tala bubu yayi mpe ke mona ti . . .

⁹⁹ Mwa basabala me luta, ntete na kukwenda na kisalu ya Nge, na Californie, Indiana yayi vwandaka ya kulala mpe ya kufwa, mpe ya vwandaka ve na luzingu, na kutala. Bafololo yina vwandaka ya kufwa automne me luta. Makasa kubwaka na bayinti. Mpe maza ya yinti na kati ya bayinti kwendaka na bansimbulu, mpe bima nyonso vwandaka ya kufwa.

¹⁰⁰ Kasi ya vwandaka na nsungi ntangu mwini bandaka na kulezima na mutindu kuswaswana. Nsemo mosi yina lezimaka na hiver, kasi bima me soba mpe ya me lezima mutindu yankaka. Mpe na kulezima ya mwini, na bima, luzingu basikaka, bisika nyonso. Makasa kuvutukaka na bayinti. Dikasa . . . Luzingu yina bikaka dikasa, mpe dikasa kubwaka, kasi luzingu kwendaka na yisi ya ntoto; ya me vutuka dyaka na kitoko ya malu-malu, na kitoko ya buntwenya. Fololo yina bikaka mananasi ya yawu—ya yawu, yina bikaka kitoko ya yawu mpe kubwaka na ntoto; ke butuka, ke basika dyaka na buntwenya ya yawu, na mananasi ya malu-malu.

Yinki ya ke bambula beto moyo, Mfumu, na bangunga yayi?

¹⁰¹ Mpe yinza ya ntoto ya kuyuma ya mawa, ya kyadi, me kuma paladiso ya kitoko, mpe banyosi mpe bandeke ke yimba, mpe bima nyonso na kyese, mpe bayinti ke bina na mipepe ya tiya ya nsungi ya printemps. Tiya mpe kyese me vutuka dyaka na zulu ya ntoto, samu na mwini, s-u-n.

¹⁰² Kasi kilumbu mosi S-o-n Mwana ke kwiza na kubeluka na mapapu ya Yandi, mpe mwa baluzingu yina bumbanaka mutindu maza ya yinti na kati ya yinti, na ntoto, mutindu luzingu yina kele na kati ya mbuma ya fololo, yawu ke basisa yawu dyaka na mavimpi ya mbote, yawu ke zimbana dyaka ata mbala mosi ve. Oh, mutindu beto ke tonda Nge samu na yayi!

¹⁰³ Mpe ya me vwanda na maboko mingi, maboko mingi yina ba me nangula na suka yayi, samu bawu zaba ti na manima ya vwale kuna, ya kele na kima mosi. Bawu zola kumona mama. Bawu ke zola kumona baya bawu ya luzolo mpe bayina bawu zabaka, mpe kuzaba mansweki nyonso yayi, mutindu bawu me kwiza awa, mpe nzila nyonso na ntangu. Yawu nyonso kele ya kuvwanda na manima ya vwale yina vwandaka ya kubumbama. Mpe kilumbu mosi Nge ke kwiza. Mpe bawu me telemisa maboko ya bawu; bawu—bawu—bawu—bawu zola vwanda ya kundima, Mfumu. Ba ke kukipesa dyaka bawu mosi ya malu-malu, mpe mutindu munu mosi. Ntangu yayi sadisa beto, Mfumu. Vutula ya malu-malu lukwikilu ya beto mpe ngolo ya beto.

¹⁰⁴ Mpe na yina beto ke kuwa kubelama ya Mfumu. Mpe bamvula makumi yiya me luta, pentecote ya malu-malu me pesama na zulu ya ntoto. Mpeve me banda na kutalisa mambu. Mpe awa beto me kuma na kidimbu ya nsuka, kaka na ntwala ya Nkwizulu. Beto me zaba ti nkwizulu ya Mfumu me kuma pene-pene. Mpe beto ke mona bambevo kubeluka na bimbevo ya bawu, yina me vwanda ngitukulu samu na yinza, bamvula mafunda zole, tuka bantumwa. Kasi awa ya kele dyaka na kumonana, bapofete ke na kubasika, Bawanzio ke na kutalana, bidimbu mpe mambu ya ngitukulu. Yinki ya kele? Mvumbukulu me belama. M-w-a-n-a ke na kwiza.

¹⁰⁵ Ti beto vwanda ya kukubama, Mfumu. Ti beto baka konso nsilulu ya Kinzambi; ti beto banza ve na mwa mazita yayi yina ba me kotisa na science, mpe nyonso yina, yina ke salama ve. Ti ya banda na kuzibula, na suka yayi, na nzila ya bantu yina lenda kufwa ve. . . [Kisika ya mpamba na bande—Mu.] . . . mutindu Yandi ke sala na kati ya Bandinga ya Biblia ya Nzambi, mutindu kisadilu ya nene ya Nzambi, samu na kubula rythme, “Mu kele Yandi yina kufwaka, mpe kele moyo ntangu nyonso.” “Na mwa ntangu fyoti, mpe yinza ke mona Munu dyaka ve; kasi beno ke mona Munu.” “Samu Mu ke vwanda na beno, ata mpe na kati ya beno, tii na nsuka ya yinza.” “Mpe ya ke salama na bilumbu ya nsuka, me tuba Nzambi, ti Mu ke mwangisa Mpeve ya Munu na zulu ya bantu nyonso; bidimbu mpe mambu ya ngitukulu; biboba ya babakala ke lota bandosi, mpe bantwenya ya babakala

ke mona ba-vision,” kidimbu ya mvula ya nsuka mpe ya ntangu ya nsuka. Ti beto kuwa yawu na kati-kati ya beto, na suka yayi, Mfumu, mpe ti lukwikilu ya beto kuvwanda na lukengolo. Samu ti beto me lomba yawu na Nkumbu ya Yesu. Amen.



KILUMBU YA BAMAMA KNG59-0510M
(Mother's Day)

Nsangu yayi ya Mpangi William Marrion Branham, kulongamaka na Kingelesi, na Kilumbu ya Bamama, na Lumingu na suka, na kilumbu ya 10 ya Ngonda ya tanu, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org